

UVOD

Projektni menadžment i investicije predstavljaju jednu složenu, heterogenu oblast u ekonomiji. U savremenom dobu poslovno okruženje u kojem privredni subjekti posluju se konstantno mijenjaju, razvijaju. Pred privredne subjekte se postavljaju novi zahtjevi koje oni, da bi postali i ostali konkurentni moraju postizati da bi zadovoljili zahtjeve svojih klijenata.

U takvom okruženju, projektni menadžment dobija sav značaj i važnost koju s pravom zaslužuje. Privredni subjekti i sistemi iz bivšeg sistema nisu mogli opstati prosto iz razloga što nisu poznavali suštinu i značaj projektnog menadžmenta.

Iz tog razloga, projektni menadžment i investicije kao podsticaj za društveno-ekonomski razvoj predstavljaju pravi izazov u pogledu definisanja problema i predmeta istraživanja. Investicioni menadžeri i privredni subjekti na tržištu uvijek se suočavaju sa pitanjem koliko je dobar određeni projekat i projektna ideja, da li je ista izvodljiva, kakve koristi će se istom ostvariti i da li je uopšte isplativo da se uđe u dati projekat. Nakon donošenja odluke o projektu i definisanja vremenskog toga projekta, budžeta, nosilaca projekta i potrebnih resursa prelazi se na implementaciju istog. Dolazi se do sprovođenja projektno ideje u djelo.

U današnjem savremenom dobu poslovanja kada su svi oblici ekonomske aktivnosti poprimili globalne razmjere, gdje se sa proste proizvodnje i reprodukcije prešlo na daleko sofisticiranije modele poslovanja došlo je do povećanja neizvjesnosti i rizika koji prate poslovanje. U današnje vrijeme upotrebljava se raznoliki spektar aktivnosti identifikovanja projekata i definisanja različitih proizvoda kako bi privredni subjekti postigli i zadržali svoju konkurentnost na tržištu.

Tema rada predstavlja značajnu oblast ekonomije i sastavni je dio investicionog menadžmenta zbog čega sam u prvom dijelu rada prije svega pošla od definisanja samog pojma menadžmenta, projekta i projektnog menadžmenta da bi došla do suštinskog predmeta rada u smislu koliko su investicije značajne za društveno-ekonomski razvoj. Na kraju sam napravila osvrt na strane direktne investicije i njihov obostrani značaj, kako za ulagača koji ulaže tako i za zemlju u kojoj se investicija realizuje.

Prilikom navođenja različitih grafikona koristila sam dostupne materijale na web stranicama i izvještaje razvojnog programa Ujedinjenih naroda, izvještaj Direkcije za ekonomska razmatranja Bosne i Hercegovini, izvore sa wikipedia internet sajta i drugu dostupnu štampanu literaturu.

Za donošenje odluka, svakom učesniku na tržištu potrebno je da na raspolaganju ima ažurne i adekvatne informacije na osnovu kojih može sagledati izvodljivost projekta, resurse i finansijska sredstva koja su potrebna za realizaciju datog projekta. Potrebno je sagledati rizičnost svoje investicione aktivnosti i izvršiti optimalno balansiranje za realizaciju što boljih očekivanih rezultata.

Prilikom pisanja koristila sam aktuelnu literaturu sa ovih prostora, inostranu literaturu kao i dostupne podatke iz ove oblasti. U ovom radu sam pokušala da prikažem jasan pregled teme rada. Kroz teoretski dio sam pokušala da objasnim i sagledam određene elemente menadžmenta,

projektnog menadžmenta i investicija koji predstavljaju jedno zaista obimno i složeno područje o kojem se može daleko više pisati i govoriti.

Ono što je bitno za napomenuti jeste da se okruženje u kojem privredni subjekti posluju stalno mijenja, zahtjevi njihovih klijenata i korisnika postaju sve veći i složeniji te shodno tome različiti rizici koji prate kako upravljanje projektom tako i njegovu realizaciju postaju sve složeniji. Iz tog razloga projektni menadžeri moraju stalno da usavršavaju svoje vještine i znanja kako bi na jedan profesionalan način mogli da odgovore današnjim zahtjevima, da pariraju i budu konkurentni na tržištu.

S toga, projektni menadžment i investicije kao podsticaj društveno-ekonomskog razvoja predstavljaju jednu bitnu, veoma složenu i nezaobilaznu oblast ekonomije čija stručna teorijska objašnjenja i praktični primjeri ukazuju koliko su isti važni za odabir prihvatljivih strategija i projekata pomoću koje se postiže društveno-ekonomski razvoj.